

## E schi nu sun morts...

Janic Maskos

Che fan noss nanins, scha'l cresch da la barba staliva, schi perdan l'ultim chavè suot lur chapütschin chi zoppainta be plü lur cheu chalv, bluot sco lur daintadüra disfatta chi maglia tuotta forza, be per as laschar gustar il past pardert d'Albina. E che esa cun Albina chi ha be plü dispet cul agen corp, tuot las fodas e la vita nun ha neir na plü la fuorma bramabla. Na be sia pel, ma eir sia chavlüra es dvantada alba sco la naiv. Ell'invlida vieplü da salar la schoppa, na cha'ls nanins s'inaccordschessan quai, brichafat, sco cha ningün nu's voul inaccordscher ch'els sun dvantats vegliuords. Ma apunta, la schoppa gusta adifal adüna meglider als nanins, impustüt las sairas, siond tuornats da la miniera be grampfchas e plonts.

Eir Albina plondscha, minchatant cun ir a bügl a far la vaschella, ma ningün chi nu tilla dess udientscha; quant'energia tilla baiva il desideri da tour e partir, ir per seis fat sur set muntognas e set flüms. Da quai chi vain quintà han las duonnas vidvart daplü curaschi. I vain discurrü d'emancipaziun e d'autonomia. Tschandurlainta ha'la nom, quella duonna ardità plain'iniziativa, prov'Albina da's regordar, guardond our da fnestra. Quella ha tut las mastrinas per man e s'ha ris-chada da scappar our da las griflas dal minchadi, giodond alchünas sairas, infin chi till'es capitada ün discapit. L'ha para pers üna da sias s-charpinas d'or chi ston esser da las müravaglias. «Uiuiui, simlas preziusitats, eu vess guardà pro meglider», scutta l'Albina be da per ella, squassond la testa sco per as deliberar d'ün sömmi malvugliaint.

La fin da l'istorgia nu s'ha amo fatta via sur ils set piccals e nossas set auas, na, quell'es adün'amo vidvart il Pisoc. La s-charpina da bellezza ha nempe chattà ün prinzi chi'd es fingià bler massa lönch ün rai. El ha adün'amo tuot ils fiers aint il fö, dond intervistas, audienzas e s'occuppond d'incumbenzas chi pudessan gnir surdattas eir als giuvens.

Sch'el nu vess da's dedichar a tanta roba, schi's vessa'l fingià lönch instradà per far üna visita a Tschandurlainta. Damaja, aviond finalmaing chattà la peida dad ir in tschercha, è'l rivà sün vampoporta d'üna chasuna. Là s'ha'l fatschendà il prüm amo da figliastras e dad üna madrastra invilgiusa. Na cha quai til vess disturbà, ün hom da si'età predscha l'attenziun da mincha duonna chi sguazz'eir be ün singul tschüt per ün tal attempà. El nun es i in schnuoglias per gnanc'üna da las figlias, neir na per Tschandurlainta, quai ha fat ün da seis serviturs. I nu vala bain na la paina da milli curtels in seis schnuogl dret be per far impreschiun a quista duonna be s-charbunada.

Per la paja ha il servitur stuvü conceder a seis rai cha la s-charpetta correspuonda bainschi a la grondezza dal pè dad ella, ma implü, ch'ella nun haja taglià las unglas dals peis. Da quai s'impipaiva seis signur, l'unic ch'el bramaiva, d'eir'ün bogn per quista femna tschuffignada, forza cha las vettas dals tschientiners passats as schogliessan aint ill'aua, ed el pudess spletschar il minz giuven e frais-ch d'üna vouta.

Ma avuonda da la Tschandurlainta, vo as dumandaivat dal sgür che chi'd es capità culla raïna noscha cul ir da tuot quists ons. Ella es restada trida e's dumond'adün'amo ad ün dumandar

chi chi saja la plü bella da tuot il pajais, as contemplond i'l spejel be puolvra. Quel tilla respuonda per main da che, ma la veglia es düra d'uraglia. «Eu nu dod, tü stoust discuorrer plü dad ot!» sbraj'la lura cun vusch güzza tras tuot il palazi cha la müraglia trembla, tant ch'ün'o tshella fanestra va in tanta tocs e cha las mürs mütschan aint per lur fouras.

Mürinas es'eir giò sül fuond dal bügl süt oura, coura i'l curtin. Ellas fan cumpagnia al ruos-ch guast. Si'ögliada tradischa la flomma chi brama la spendranza, il bütsch da la princessa. Ma a quella nun ha vis plü ingün. Fors'è'la ida a far alch cura da tshella vart pro'ls set nanins ed albina, sü illas otezzas, ingio cha'l dragun dal Lai Grond patischa fom.

Cur cha'ls pasters sun its sün alp cun lur muvel scornà pella prüma jada, schi'l dragun ha recugnuschü sia furtüna o sco chi's voul, sia disfurtüna. L'armaint schmuottà nu vaiva plü ingün'arma per as defender, uschè cha'l dragun s'ha laschè gustar güsta tuot las vachas in d'üna.

A l'ur dal Lai Grond nun esa plü föglias d'or. Ils chapitalists tillas han chattadas, clettas e vendüdas. Perquai lavuran uoss'ils nanins illa miniera s-chüra e's regordan mincha di cun tuornar a chasa, guardond insü vers las stailas, co chi tillas han battüdas our da las föglias d'or da temp vegl. Lura piglia giò ün o tsel qualjadas sia chapütscha, uschè cha'l cheu chalv refletta la glüna, tilla plaja per mez per terdscher la larmetta chi cula be plan giò tras las valladas fodigliadas da sia fatscha.

Dimena che fana, noss nanins, las madrastras e figliastras, princessas e prinzis, lur amantas nairas suos-chas, ruos-chs e draguns schi nu sun morts? I vivaran amo hoz, simplamaing cun tuot lur fadias, lur plonts, cun mals da qua e da là, cun surriers plain spranza ed ögliadas chi desidereschan. Ma a la fin dals quints, che füss üna ditte o üna tarabla chi nu's müda? – Eu nu sa. In mincha cas bricha üna tarabla!